



1. juli 2009

Inatsisartut suleriaasiani § 36, imm. 1 naapertorlugu, Naalakkersuisunut tulluiuttutut apeqquteqaa-teqarpunga:

Inatsisartut suleriaasianni § 36, imm. 1 naapertorlugu Naalakkersuisunut apeqqut: Nuummi Tuapannguani inissarsuit nutaat sananeqartut kingulliit Nuummi innuttaasunut tuniniarneqarniarpat? Imaluunniit Namminersorlutik Oqartussat sulisuinut atorniarneqarpat? Aammalu Inatsisartut nutaamik aalajangernissaat siunnersuutigineqalersaarnersoq?

(Inatsisartunut ilaasortaq Doris Jakobsen, Siumut)

Naluneqangitsutut Nuummi inissarsuit isutseriarlugit nutaanik sananeqartut innuttaasut namminneq piginneqataaffigisassaattut suliarineqarput, Tuapannguani ineqarsimasut pisisinnaanerat salliutillugu.

Kommuuneqarfik Sermersuumi Siumut sinnerlugu ilaasortat upernaq manna siunnersuutigaat Nuummi Tuapannguani sananeqartut ilaannik pisinissaq, Nuummi innuttaasorpasut inissaaleqisut ikilisarniarlugit.

Kisianni Kommuuneqarfik Sermersooq aammalu Namminersorlutik Oqartussat akornanni oqaloqatigiinnerit aammalu ilaasortanut allakkat akissutitut tunniunneqartartut takutippaat, eqqarsaatersuutigineqalersimasoq Tuapannguani inissarsuit sananeqartussat kingulliit Namminersorlutik Oqartussat sulisuinut atorneqassasut innuttaasunut tuniniarnagit, kisiannili tamanna Inatsisartunngortut nutaat aalajangigassaringaat.

Isumaqarpunga akissuteqaat tamanna assut tupaallannartoq tassami Inatsisartut qangali aalajangereernikummata taakkua Tuapannguani sanaartukkat innuttaasunut atorneqassasut Namminersorlutik Oqartussat sulisuinuunngitsoq, aamma tupinnarpoq Inatsisartut aalajangeriigaat illorsuillu sanaartorneqalereersut soormi qinersisoqarnerata kingornatigut siunertamikkut allanngortinniarneqarnersut.

Taamaammat Ineqarnermut Naalakkersuisumut apeqquteqaatigissavara Tuapannguani inissarsuit kingulliit sananeqartut Nuummi innuttaasunut tuniniarneqarniarnersut imaluunniit Namminersorlutik Oqartussat sulisuinut atorniarneqalersaarnersut? Aammalu Inatsisartut nutaamik aalajangernissaat siunnersuutigineqalersaalersimansoq?